

საქართველოს მეცნიერებათა ეროვნული აკადემიის
პრეზიდიუმის 2023 წლის არჩევის დროებითი
დ ე ბ უ ლ ე ბ ა

I. ზოგადი დებულება

საქართველოს მეცნიერებათა ეროვნული აკადემიის (შემდგომში - აკადემია) პრეზიდიუმის არჩევნები ტარდება „საქართველოს მეცნიერებათა ეროვნული აკადემიის შესახებ“ საქართველოს კანონის, საქართველოს მეცნიერებათა ეროვნული აკადემიის წესდებისა და ამ დებულების შესაბამისად.

II. პრეზიდიუმის არჩევა

2.1. „საქართველოს მეცნიერებათა ეროვნული აკადემიის შესახებ“ საქართველოს კანონის (თავი III, მუხლი 8, პ. 2) თანახმად, აკადემიის პრეზიდიუმს აკადემიის ნამდვილ წევრთაგან (აკადემიკოსთაგან) ირჩევს აკადემიის საერთო კრება ხუთი წლის ვადით, ფარული კენჭისყრით.

2.2. აკადემიის პრეზიდიუმის არჩევისას, საერთო კრებაზე ხმის უფლებით სარგებლობენ აკადემიის ნამდვილი წევრები (აკადემიკოსები) და აკადემიის წევრ-კორესპონდენტები.

2.3. აკადემიის პრეზიდიუმის კანდიდატის წამოყენების უფლება აქვთ: აკადემიის პრეზიდიუმს, აკადემიის სამეცნიერო განყოფილებებს, აკადემიის წევრთა ჯგუფებსა და აკადემიის ცალკეულ წევრებს. კანდიდატების წამოყენების ვადა განისაზღვრება აკადემიის პრეზიდიუმის დადგენილებით.

2.4. აკადემიის პრეზიდიუმის კანდიდატის წარდგინება რეგისტრირდება აკადემიის კანცელარიაში და შემდგომი მსვლელობისთვის გადაეცემა აკადემიის აკადემიკოს-მდივანს. რეგისტრირებული კანდიდატების შესახებ ინფორმაცია ქვეყნდება აკადემიის ვებ-გვერდზე ([http:// science.org.ge](http://science.org.ge)).

2.5. პრეზიდიუმის კანდიდატებმა საერთო კრებას უნდა წარუდგინონ თავიანთი მომავალი სამეცნიერო-საორგანიზაციო მუშაობის პროგრამა.

2.6. აკადემიის პრეზიდიუმის არჩევისას აკადემიის საერთო კრება უფლებამოსილია, თუ მას ესწრება აკადემიის ხმის უფლების მქონე წევრთა საერთო რაოდენობის არანაკლებ სამი მეხუთედისა.

2.7. ფარული კენჭისყრის შედეგად, არჩეულად ჩაითვლება ის კანდიდატი, რომელიც მიიღებს ხმების მეტ რაოდენობას, მაგრამ სიითი შემადგენლობის ნახევარზე მეტს.

2.8. კანდიდატთა მიერ ასარჩევად მიღებული გამსვლელი ხმების თანაბარი რაოდენობის შემთხვევაში ტარდება განმეორებითი ტურები. სამი ტურის შემდეგ კანდიდატურის აურჩევლობის შემთხვევაში ინიშნება ხელახალი არჩევნები.

2.9. აკადემიის წევრთა სიით შემადგენლობას აზუსტებს აკადემიის პრეზიდიუმი და ამტკიცებს აკადემიის საერთო კრება.

2.10. აკადემიის საერთო კრებაზე აკადემიის წევრთა სიით შემადგენლობაში არ ჩაითვლებიან ხმის უფლების მქონე ის აკადემიკოსები და წევრ-კორესპონდენტები,

რომლებიც არჩევნების დროს საზღვარგარეთ იმყოფებიან, აგრეთვე, ხმის უფლების მქონე აკადემიკოსები და წევრ-კორესპონდენტები, რომელთა შესახებ მიღებულია აკადემიის პრეზიდიუმის სპეციალური დადაგენილება ჯანმრთელობის მდგომარეობის გამო არჩევნებში მონაწილეობისაგან მათი განთავისუფლების შესახებ.

III. კენჭისყრის წესი

3.1. აკადემიის საერთო კრებაზე, საარჩევნო ბიულეტენში და საარჩევნო სიაში აკადემიის პრეზიდენტობის კანდიდატთა გვარები განთავსდება ანბანური წესით.

3.2. საარჩევნო ბიულეტენში პრეზიდენტობის კანდიდატთა გვარის გასწვრივ არის სიტყვები „თანახმა ვარ“ და „წინააღმდეგი ვარ“, რომელთაგან კენჭისყრაში მონაწილემ უნდა გადახაზოს ერთ-ერთი. იმ შემთხვევაში, თუ ბიულეტენში წაშლილი ან დატოვებულია ორივე აღნიშვნა „თანახმა ვარ“ და „წინააღმდეგი ვარ“, ბიულეტენი ამ კანდიდატისთვის ჩაითვლება გაუქმებულად (ამომრჩეველი უფლებამოსილია, ხმის მიცემა განახორციელოს ერთი ან მეტი კანდიდატის მიმართ).

3.3. საარჩევნო ბიულეტენის შევსებისას დაუშვებელია სხვა პირის დასწრება, ამომრჩეველს, რომელსაც არ შეუძლია დამოუკიდებლად შეავსოს საარჩევნო ბიულეტენი, უფლება აქვს დასახმარებლად მიიწვიოს ნებისმიერი პირი, გარდა აკადემიის წევრებისა.

3.4. საქართველოს მეცნიერებათა ეროვნული აკადემიის საერთო კრებაზე აკადემიის წევრთაგან ირჩევენ ხმის დამთვლელ კომისიას.

3.5. არჩევნებში მონაწილეთა მიერ ფარული კენჭისყრის ბიულეტენის მიღება დასტურდება ხელმოწერით.

საარჩევნო ბიულეტენის გაფუჭების შემთხვევაში, ამომრჩეველმა უნდა ჩააბაროს იგი ხმის დამთვლელი კომისიის თავმჯდომარეს, რომელიც გაფუჭებულ საარჩევნო ბიულეტენს ჩამოაჭრის კუთხეს და დააწერს მას „გაფუჭებულია“, ხოლო ამომრჩეველს გადასცემს ახალ ბიულეტენს.

3.6. ფარული კენჭისყრა ტარდება აკადემიის შენობის (მის: თბილისი, რუსთაველის გამზ. N 52) სპეციალურად გამოყოფილ ოთახში, სადაც დგას დალუქული ყუთი და იმყოფებიან მხოლოდ ხმის დამთვლელი კომისიის წევრები.

ბინაზე ხმის მიცემის აუცილებლობის შემთხვევაში, ხმის დამთვლელი კომისიის თავმჯდომარე კომისიის წევრთაგან გამოყოფს ჯგუფს, რომელიც უზრუნველყოფს ბინაზე კენჭისყრას.

ბინაზე კენჭისყრის შემდეგ ყუთი იხსნება კენჭისყრის ძირითად ყუთთან ერთად და იწყება ხმების საერთო დათვლა.

3.7. ხმის დამთვლელი კომისიის ოქმებს ამტკიცებს აკადემიის საერთო კრება ხმათა უბრალო უმრავლესობით.

3.8. ხმის დამთვლელი კომისიის ოქმები, ფარული კენჭისყრის ბიულეტენებთან ერთად ინახება დალუქული კონვერტით საქართველოს მეცნიერებათა ეროვნულ აკადემიაში.

საქართველოს მეცნიერებათა ეროვნული აკადემიის აკადემიკოს-მდივანი
აკადემიკოსი



რ. ხუროძე